

2 TIMOTEO

2 Timoteodih jwí túi beh joyát pínah naáwát

¿Déhe tiguaá daácniji? Pablo, Dios á jib bohéat túetni nin núodih át daacáp wut jī. Pablo ded pah á jumatdih chah jéihíhna, Romanosdih jwí túi beh joyát pínah naáwát dīh ñi enee.

¿Dédhedih át daácji? Timoteodih nin núodihbat Pablo át jwúub daacáp wut jī. (Eneé: 1 Timoteodih jwí túi beh joyát pínah naáwát)

¿Dedmant, débólíh cah, át daácji? Nerón Romanowá í maáh á jumuchah, Roma tútchiboó nemat muúboó Pablodih ít jwúub nemep wut jī. Caán láa yeejép camahni pehbóo jumnit, á wunat pínah bahnijeh á judhdad dīh át jéihyep wut jī. (1.16-17; 2.9; 4.13) Chah jéihnit “Jópchi 67—68 (Jesús á wunat túttimah 34—35 jópchi túttimah) nin núodih át daacáp wut jī. Nin núo Pablo á pée daácní caá”, í niíf jenah joiná caá.

¿Dedé pínah tiguaá át daácji? Pablo bícjeh jumna, jígahnit, chah yeejép láa á jumuchah, Jesúhwaá ded pah í jumatdih jéihíhna, nin núodih Timoteodih át daacáp wahap wut jī. Timoteo páantjeh Éfeso tútchiboó jumnit, queét Éfesodih moón Jesúhwaádihbat ded pah á jumat doonádih wahna át chájap wut jī. (4.22)

Ded pah 2 Timoteo á jumat:

1. Timoteodih á naóh jwíihát (1.1-4)
2. Timoteodih á náhni dahwaat (1.5-14)
3. Ded pah Pablo á jumat (1.15-18)
4. Timoteodih á wutat (2.1-26)
5. Jesús á jwúub dei júúwát pínah játih ded pah á jumat (3.1-9)
6. Timoteodih bíhí á wutat (3.10—4.8)
7. Pablohí bíhí dooná (4.9-18)
8. Pablo á pée táyat tútat (4.19-22)

Timoteodih á táyat tútat

1 Weém, Pablo, Jesucristoíh doonádih Dios á naáwát túetni jumna, nin núodih meém Timoteodih wá jwúub daacáp wahna caá. “Nihat Jesucristodih jepahnit wájeéh í túi jumnipna caá”, á niijátjidih bitadih Dios weemdíh á naóh bohéat tútat jī. ²Timoteo, wá wúuh panihni ma jumuchah, meemdíh búdí wá oina caá.* Dios jwí íp, jwí Maáh Jesucristo bícdih meemdíh oinit, í jígah en teo wáaca naáh, ma túi jumat pínah niijná.

Pablo Diosdih “Túina caá”, á niiját

³Diosdih úbhna, yeó jáap, chei jumat pahbat meemdíh wá úbhna caá. Pánih úbhnit, “Timoteodih búdí ma teo

wáacatdih túina caá, Paá”, wárpí niijná caá. Caán Diosdih tiguaá jwí nuowá wéinit, ípí jepahat pahjeh mantih, weembút caandíh wéinit, wá jepahna caá. Pánih jepahnit, dedé yeejép chájat peéh weemdíh á wihcatdih wá jéihna caá. ⁴Con láa meemdíh wá cádah bejehah, ma júnátjidih náhninit, majeéh jumnit, túi weñat túet niijná, meemdíh wá jwúub eníhna caá. ⁵Meém Jesús dīh ma túi jenah joyát dīh wá náhnina caá. Ma éet Loida, ma ín Eunicebat Jesús dīh ít jwíh jepahap tajī. Pánihna, queétdih en yacnit, meembút caandíh ma túi jenah joiná caá.*

⁶Meemdíh wá teo jáha úbúchah, Dios meemdíh á wépatdih búdí át wúhup jī, á wutat pah bitadih ma túi teo wáacat pínah niijná. Páant á chájatjidih náhninit,

* 1.2 Hch 16.1; 1Ti 1.2 * 1.5 Hch 16.1

umcanejeh, a wēpatjīh bitadīh chah ma teo wáacá. ⁷Dios jwiítidīh Túini Espíritudīh át wūhup be, jwījeéh ā jumat pínah niijná. Pánih jwījeéh jumni Túini Espiritu jwiítidīh búdí ā teo wáacna caá, cáacwā ded pah ī jenah joyátidīh jwī umcat pínah niijná. Páant ā teo wáacachah, cáacwādīh oinit, ā wēpatjīh queétdīh jwī jéih teo wáacna caá. Caán Túini Espiritujeh jwiítidīh ā túi jenah joyát túatna caá. ⁸Pánihna, jwī maáih doonádīh bitadīh naóhna, ma tíic jenah joicá bojoó. Weém áih doonádīh wā bohéat jíib nemat muúboó wā jumuchah, wā chéen ma jumatdīhbut ma tíicca bojoó. Obohjeéhtih, táini doonádīh ma bohéat jíib meemdīhbut yeejép ā yapachah, “Á túimi nacaá”, ma niijí. Páant ā yapachah, Dios meemdīh ā teo wáacipna caá, caandīh ma cádahcat pínah niijná. ⁹Jwiít iiguípna bejnit déejidīh Diosjeh jwiítidīh át túi ubup wut jī. Pánih túi ubnit, jwiítidīh át níwip wut jī, áihwā jumnit, jwī túi chājat pínah niijná. Obohjeéhtih, jwī túi chājat jíib át níocap wut jī. Nin baácđih ā chājat pínah játih ā jenah joyátjī pah jwiítidīh oina, át níwip wut jī. Pánih oina, jwiítidīh túi ubni pínah Jesucristodīh ā wah deyaat pínahdīh át jenah joyóp wut jī. ¹⁰Pánih jenah joinjī caandīh wah deyana, ā oyatdīh jwiítidīh ā túi jéihyana caá. Páant ā wah deyani Jesús jwiít áihwādīh iiguípna jwī bejat déejidīh át túi ubup wut jī. Caán Jesúsđih jepahna, páantjeh Diosjeh jwī túi jumat pínah doonádīh jwiítidīh naawádīh át dei jūúwúp wut jī.

¹¹Weemdīh níonit, Dios ā wahap jī, caán túini doonádīh wā naawát pínah niijná. ^{*} ¹²Páant ā wutatdīh wā jepahatjī jíib buu nin nemat muúboó jumnit, yeejép wā yapna caá. Obohjeéhtih, pánih yeejép yapna yuhna, wā tíic jenah joicán caá. “Wā jepahni Jesús tíi wēpni jumna, áih doonádīh naawát túatnit, weemdīh ā túi teo wáacipna caá. Páant ā teo wáacachah, púú ā jwúub dei jūúwúchahna, caandīh túi jenah joí cádahcan, páantjeh áih doonádīh wā naóhbiapna caá”, wā niij jenah joiná caá.

¹³Meémboó Jesucristodīh túi jenah joiná, caandīh oinit, meemdīh yoobópdīh wā bohéatjī pah ma chāj cádahca bojoó. ¹⁴Jwījeéh jumni Túini Espiritu ā teo wáacatjīh Dios meemdīh ā naawát túatnidīh yoobópdīh ma bohénaá. Caandīh túi náhninit, mácah ma bohéca bojoó.

¹⁵Nihat Asia baácđih moón Jesúhwa weemdīh cádah tigaá ít chājap. Pánih tigaá í jwúub jígochap. Íjeéh Figelo, Hermógenes wut jumnitbut í cádahatdīh ma jéihna caá. ¹⁶⁻¹⁷Páant queét nihat weemdīh í cádahachah yuhna, Onesiforoboó dawá láa weemdīh enedih junít, ā túi weñanap be. Nemat muúboó wā jumuchah yuhna, Roma tútchiboó junít, wā chéen ā jumatdīh tíic jenah joicánjeh, weemdīh maatápdīh bidniji weemdīh ā bid juyúp jī. Páant weemdīh ā túi teo wáacat jíib, ā déewādīh jwī Maáh ā jígah en teo wáaca naáh. ¹⁸Éfeso tútchiboó jwī jumuchah, weemdīh búdí ā teo wáacatjidīhbut ma túi jéihna caá. Pánihna, jwī Maáh Jesúsđih búdí wā úbhna caá, nin baácboó jwúub dei jūóhnit, caandīh búdí ā jígah en teo wáacat pínah niijná.

Jesúh túini soldado panihni

2 ¹Meémboó, wā wúuh panihni, Jesucristo meemdīh oinit, ā teo wáacachah, caandīh ma túi péenaá. ²Dawá wā bohéatdīh joinjī meem jwáh bitadīh ma bohénaá. Páant queétdīh ma bohénachah, Dios ā náahat pah túi chājnit, bitadīh bohé jéihnitbut í jumú naáh.

³Soldadodīh buwat ā jumuchah yuhna, ā cádahcat pah muntih, meemdīhbut bíic yoobó ā yapachah, Jesúsđih ma cádahca bojoó. Jwiít nihat Jesúhwardīh bíic yoobó ā yapna caá. ⁴Ded soldado ā maáhdīh weñáihna, ā wutat pahjeh caá ā chājap. Soldado nihcanni ā chājat pínahdīh páantjeh chājna, ā maáh ā wutat pah áta jéih chājcan tagaá. Pánihna, soldado ā chājat pah muntih, meembút Dios ā weñat pínahdīhjenah jenah joinít, ā wutat pah ma túi chājáa.

* 1.11 1Ti 2.7

⁵Pánihat dée, ded náoni maáta ī wutat pah tái chājnjeh, ā wēp náwat jībīdih ā jéih bíbohna caá. Pánihna, náoni ā tái chājat pahjeh muntih, Jesucristo ā wutat pah ma tái chāj cádahcat jīb, ā pebhna ma juibínachah, meemdih ténidih ā wūhbiḡna caá. ⁶Pánihat dée muntih, wápchi tái teoniboó ā tewat jīb jeémátdih jwíh bíbohna caá náahap. Pánihna, Dios meemdih ā wutat pah ma tái chājat jīb, ā pebhnoó ma juibínachah, meemdih wéinit, ā tái chājbiḡna caá. ⁷Wā niijátjidih ma tái náhninaá. Páant ma náhninachah, jwí Maáh meemdih ā tái jéihyabipna caá.

⁸Ded pah Jesucristo ā jumátjidih ma quíib buúdcá bojoó. Caán maáh David juima át jumap wut jī. Wūnna yuhna, ā jwúub boo pud jūúwátjī tání doonádih wápí bohénap jī. ⁹Pánih caandih wā bohéat jīb, yeejép chājnitdih ī nemat pah, weemdih ítah tōjpīh chéonit, nemat muúboó ī nemechah, wā moh yéejna caá. Pánih jumna yuhna, Dios naáwátdih wā bohé cádahcan niít.

¹⁰Dios ā ñonitdih bohéna, yeejép wápí yapna caá, queébtut Jesucristoihwā ī jumát pínah niijná. Áihwā iiguípna bejnit déejidih ā tái ubnit pínah ī jumuchah, queé Diosjeéh ī tái jumbipna caá.

¹¹Nin naáwát yoobópdih caá:

Cristo jwí yeejat jīb ā wun wūhat pah muntih, jwíitbut ájeéh wūnnit panihnit, yeejatdih cádahnit jwí jumna caá. Pánih cádahnit, ájeéh jwúub boo pud jūóhnit panihnit, ájeéh páantjeh jwí jumbipna caá.

¹²Áihwā jwí jumát jīb yeejép yapna yuhna, ā náahat pah jwí chāj cádahcan, ā maáh jumapboó caán bícdih jwíitbut maáta jwí jumbipna caá. * Obohjeéhtih, “Jesucristodih wā jéihna caá”, jwí niijáchah, caanbút jwíitdih bíc yoobó ā niijbipna caá. *

¹³Jwíit jwí niijátjī pah jwí chājchah yuhna, caánboó ā niijátjī pahjeh ā chājbiḡna caá.

Yeecanni jumna, ā niiját pahjeh chājni ā jumna caá.

Diosdih tái teo wūhni ded pah ā jumát

¹⁴Majeéh jumnit Jesúshwādih buútéh wā naáwátdih ma tái náhninaá. Dios ā enechah, queétdih ma míc jūihcat tūatú. Í jenah joyátjīhjih ī míc jūihhuchah, dedé pínah níehna caá. Pánih jūihna, teo wáaccan, míc yéejana caá ī chājap. Í míc jūihñatdih joinit, ī būwa jenah joiná caá. ¹⁵Dios naáwátdih tái jéihnit, caán meemdih ā wutat pah, bitadih áih tání doonádih yoobópdih ma bohénaá. Páant ma chājachah ennit, “Ma tái chājna caá”, Dios ā niijáchah joinit, ma tíccan niít.

¹⁶Diosdih jéihcannitboó ī jenah joyátjīhjih ī míc wéhenachah, ma joyáh bojoó. Páant ī míc wéheat dedé pínah nihcah, chah ī yéej chājbiḡna caá.

¹⁷Páant ī yee bohéat, yahwit ā moóp aabát pah, bitadih ī yéejana caá. Páant tigaá Himeneo, Fileto wūt jumnitbut í chājap. ¹⁸Páant ī yee bohéatdih joinit, Dios naáwát yoobátdih í cádahap wut jī. Pánih cádahnit, “Jesúshwā jáantjeh ítat pūh laab béjep be”, queé ít niij yee bohénap wut jī. Pánih mácah bohénit, biquína Jesúshwādih ī yéejanachah, caandih í cádahap wut jī. ¹⁹Obohjeéhtih, páant ī yee naóh bohénachah yuhna, Dios naáwátboó yoobópdih ā jumna caá. Caán ā tūat nūmcán niít. Páantjeh bíc yoobó ā jumbipna caá. Nin pah Dios naáwátdih naóh yapni át niij daacáp tajī: “Jwí Maáh áihwādih ā jéihna caá”, át niij daacáp tajī. * “Jesús wā Maáh caá”, niijnitboó, yeejép ī chājatdih í cádahna náah”, bíhboó át niij daacáp tajī.

²⁰Jwíit Jesúshwā nin pah caá jwí jumap: Búdi muúboó dawá pamapna ā jumna caá. Biquína oro, platajīh ī chājnjih jum, biquína máa naá, wáam déepjīh ī chājnjibut ā jumna caá. Pánihna, caán muú mínah cáacwādih nūmah jeémpnit, áih oro, platajīh ī chājnjih pamapnadih wéi ennit, ī jeémát pínahdih ā cáagna caá. Obohjeéhtih, máa naá, wáam déepjīh ī chājnjiboó yeó jáap jumát pah

* 2.11-12 1P 5.1 * 2.12 Mt 10.33; Lc 12.9 * 2.19 Nm 16.5; Jn 10.14; 1Co 8.3

jeémát cáagat pínah, i yohnidih i yacat pínahbut ã jumna caá. ²¹Pánihat pah, ded yeejép ã chājatdih cádahnit, oro, platajih i chājniji pama panihni jumna, jwī Maáh ã weñat pínahdih ã jéih chājbična caá. Páant ã chājachah, jwī Maáh caandih ã wēi enbipna caá.

²²Meémboó jáap jumna, japata i yéej chāj ñinahatdih enna, iinít, bíaboó ma bejeé. Pánih iinít, táiniboodihjeh chājna, jwī Maáh Jesúsdi h chah jenah joinít, bitadih ma túi oyoó. Pánih oinít, míic jūihcanjeh, ijeéh ma túi jumúú. Nihat Jesúsdi h túi úbhñitbut bíic yoobó i chāja naáh. ²³Jenah joicánnit i míic jūihñuchah, ma joyáh bojoó. Beh joicánjeh, míic úbh joinít, queétjeh chah i míic jūihna caá. ²⁴Obohjeéhtih, Dios naáwátidih bohéniboodih míic jūihcat caá náahap. Pánih jūihcan, nihadidih túi chājnit, túi bohénit, bíicmantjeh íjcan táinijeh jumt caá náahap. ²⁵Á naáwátidih joíhcan, mácah niijnítidih íjcanjeh túi bohéat caá náahap. Páant táinijeh ñi bohénachah joinít, Dios ã teo wáacatjih i yap yohatdih cádahna, túini bohéatboodih “Caán yoobópdi h caá”, i niij jenah joibípna caá. ²⁶Pánihna, yoobópdi h bohéatdi h joinít, queét nemépwá i maáh ã náahat pah chājnitji caandih i cádahbipna caá. Pánih cádahnit, ã jwúb yéej chājat túutuchah yuhna, yoobópdi h bohéatdi h jepahnit, ã wutatboodih i jepahcan niít, buca.

**Péeni yeó jáapdi h
ded pah cáacwā i jumt pínah**

3 ¹Buu, Timoteo, nindihbut ma túi náhninaá: Jesús ã jwúb dei jūúwát pínah játih, cáacwādi h búdí buwat ã jumbipna caá. ²Caán láa, cáacwā bitadidih teo wáacat pínahdih jenah joicán, i weñat pínahdihjeh i jenah joibípna caá. Pánih jenah joinít, dawá bíí déedih i bidbipna caá. “Nihatdih jéihna, bitadidih chah wā jumna caá”, niij jenah joinít i jumbipna caá. Cáacwādi h, Diosdi hbut yeejép wéhenit, i mánadi hbut yap yohnit i jumbipna caá. Bitá queétidih i túi chājachah yuhna, “Túina caá”, niicánnit

i jumbipna caá. Diosdi h wēicanjeh, búdí yeejép chājnit i jumbipna caá. ³Cáacwādi h oican, i jígah en teo wáacac niít. Yeejép doonádi h naóhñit i jumbipna caá. I jenah joyátjihjeh yeejépdih i jéih chāj cádahcan niít. Cáacwādi h túbit yeejép chājnit, táiniboodih i en iibípna caá. ⁴I chéenwādi h yah buca yeejép i chājbična caá. Jenah joicánjeh chājnit, “Jéih beedáni caá”, niij jenah joinít i jumbipna caá. Queét i weñat pínahdihjeh chājnit jumna, Diosboodih náahcannit i jumbipna caá. ⁵Cáacwā i enechah, Diosdi h túi wēinit pah jíghñit jumna yuhna, i jenah joyátidih ã túut nuumát pínahdih i náahcan niít. Pánihnitdih ma pej jumca bojoó.

⁶Biquína pánih chājnit bita h munnádi h waadní, “Dios naáwátidih yeebdi h bohénadi h wā jūúwáp be”, caanjih jumnit yaádhdi h ípí niij yeena caá. Páant i niij yeenachah yuhna, queét yaádh túi jenah joicánnit, yeejép chājnit jumna, i yee bohéatdi h wēi joiná caá. Queét yaádh búdí i yéej chājihna caá. ⁷Pánihna, dedé mácah yee bohéatdi h joíhna, Diosi h yoobópdi h bohéatboodih i náahcan caá. ⁸Jon játih Egiptodih moón jíóhñitji, Janes, Jambres wūt jumnit, Moisésdi h it yap yohihip wut yuh jí. * Páant i yap yohi hah pah muntih queét yaádhdi h yee bohénitboó táini bohéatdi h i en iiná caá. Queét yeejépdihjeh jenah joinít i jumna caá. Pánih jumna, Jesúsdi h túi jenah joicán, áihwā yoobát i nihcan caá. ⁹Queét i yee bohé jibichah yuhna, daocánnitjeh queétidih i jepahbipna caá. I yee bohéatdi h “Caán yeejép bohéat caá”, cáacwā i niij jéihbipna caá. Janes, Jambresjih i yeeatjidih jon játih moón i jéihyat pah muntih, Jesús ã jwúb dei jūúwát pínah játih jumnitbut i yeeatdi h i jéihbipna caá.

Timoteodih ã jwúb wutat

¹⁰Obohjeéhtih, ded pah wā bohéat, wā jumt, wā jenah joyátidihbut meemjéh ma túi jéihna caá. Jesúsdi h wā túi jenah joyátidih, íjcat wihcanjeh cáacwādi h oina wā teo wáacat, yeejép yapna yuhna wā

* 3.8 Ex 7.11

cádahcatdihbut ma jéihna caá.

¹¹Weemdih yeejép ī chājachah, bádí wā yéej chūáátjidihbut ma jéihna caá. Antioquía, Iconio, Listra tútchinaboó Jesúh doonádih wā jib bohéat jīb, weemdih yeejép ī chājatjidihbut ma jéihna caá. Obohjeéhtih, ī mawíhichah yuhna, jwí Maáh Jesúsboó weemdih ā wapachah, ī jéih maocap jī.* ¹²Páant weemdih ī chājat pah, nihat Jesucristoíhwā caandíh ī tūi péeat jīb, bita queétdihbut yeejép ī chājat pínahdihbut jwí jéihna caá. ¹³Yeejépwā, yeenitbut chah yeejép chājnit ī jumbipna caá. Bitadih yeena, queétejehbut ī yeeatdih joiná, chah yeejép ī jumbipna caá.

¹⁴Obohjeéhtih, ma éet, ma íin, weembát meemdih jwí bohénachah joiná, meémboó mat tūi jepahap wut jī. “Weemdih bohénit yeenit nihcan caá”, níj jéihnit, yoobópdih jwí bohéatjidih tūi náhninit, ma pée cádahca bojoó. ¹⁵Meém wébít jum láa, Dios naawátdih mat jéih jwíhip wut jī. Pánih jéihnit, Jesucristodih tūi jepahnit, iiguípnā bejni déejidih Dios ā tūi ubni ma jumna caá. ¹⁶Dios naawátdih nihat daácnitdih “Nin pah ma níj daacá”, Diosjeh át níj daacát tūtup wut jī. Pánihna, ī daacátjidih jwiítdih bohéat caá náahap, yoobópdih naawátdih jwí tūi jéihyat tūt niijná. Pánih jéihnit, “Caán yeejép wā chājatdih cádahat caá náahap”, jwí níj jéihna caá. Caandíh bohéna, tūiniboodíh jwí jéih tūt nūmná caá. Pánihna, yeó jáap jumat pah tūi chājat tūt niijná, ā naawátdih bohéat caá náahap. ¹⁷Ded Dios naawátdih tūi míic bohéna, nihat tūinidih ā jéih chājipna caá.

4 ¹Jesucristo, nihat cáacwā ī Maáh jwúub dei jūóhna, báadhnit, wānnitbut ded pah ī chājatjī jīb ā naóhbpna caá. Pánihna, caán, ā íip Diosbut ī enechah, meemdih nin pah wā wēp naóhna caá: ²Yeó jáap jumat pah cáacwā ī joífhichah, ī joífhchah yuhna, Dios naawátdih páantjeh ma bohénaá. Pánih bohéna, cáacwā ī yéej chājatdih

jéihyanit, “Jwúub yéej chājcanjeh, tūiniboodíh nī tūt nūmná”, ma níj naawá. Pánih naóhnit, chūécánjeh, queétdih ma tūi bohé cádahca bojoó. ³⁻⁴Tútimah bóo láa, cáacwā tūini bohéatdih ī joífhcan níf. Pánih joífhcan, ī náahatdihjeh chājíhna, ī weñat pínah bohéatdihjeh joífhnit, mách bohénitboodíh bádí ī bidbipna caá. Páant ī bidichah, dawá queétdih ī yee bohébpna caá. Tūini bohéatdih cádahnit, mách bohénit ī jenah joyátjijeh ī bohéatboodíh ī joibipna caá. Pánihna, waícanjeh páant ā yapat pínahdih jéihnit, meémboó Dios naawát, yoobópdih jumnidih, ma bohé cádahca bojoó. ⁵Pánih bohénit, queé yeenit pah chājat tūt niijná, tūi jenah joiní ma jumú. Yeejép yapna yuhna, bíic yoobó chājnit, tūini doonádih ma bohé cádahca bojoó. Pánih cádahcan, Dios meemdih ā wutat pah ma tūi chāj péanaá.

⁶Weém Dios ā wutat pah, ā naawátdih wā jib bohéatjī jīb weemdíh ī mao yohat pínah bahnjeh caá ā jūdhdup. ⁷Wā wnat pínah játih nin pah meemdíh wā naóhna caá: Jesúh tūini doonádih Dios weemdíh ā bohéat tūtchah, wā tūi bohénap be. Nihat ā wutat pah wā chāj péanap be. Pánih chājnit, yeejép yapna yuhna, caandíh wā tūi jenah joí cádahcap be. ⁸Pánihna, wā tūi chājatjī jīb jwí Maáh jeáboó ā bíboh páina nacaá. Nihat cáacwā ded pah ī chājatdih jéih beedána, yoobópdih jīb wūhni jumna, ā wutatdih wā tūi jepahatjī jīb, ā jwúub dei jūóhni yeó jáapdih weemdíh ā tūi chājbpna caá. Bitā caandíh oinítbut ā jwúub dei jūáwát pínahdih tūi páinit ī jumuchah, jwí Maáh Jesús bíic yoobó queétdih ā tūi chājbpna caá.

Timoteo ded pah ā chājat pínah

⁹Waícanjeh wā pebhna ma jūúwá. ¹⁰Demas wūt jumni chah dawá bíí déedih náahna, weemdíh cádahnit, Tesalónica tútchina ā jwúub bejep be.* Crescente wūt jumni Galacia baácna ā bejchah, Tito wūt jumnitbut Dalmacia baácna ā bejep be.* ¹¹Páant ī yoh bejat tútimah,

* 3.11 Hch 13.14-52; 14.1-20 * 4.10 Col 4.14; Flm 24 * 4.10 2Co 8.23; Gá 2.3; Tit 1.4

Lucasjeh caá wãjêéh ā chāwáp.* Pánihna, bita teo wáacnitdih náahnit, meemdíh wã jũúwát tútutna caá. Pánih jũóhnit, Marcosdihbut ma nũmah jũúwá.* Cristofh doonádih wã bohénachah, weemdíh túi teo wáacni pínah caán ā jum̄bipna caá. ¹²Tíquicodih Éfeso tútchina wã wahap be.* ¹³Ninna jũóhna, Troas tútchiboó* Carpo wút jum̄niih m̄uudíh wã jwey jũóhni cúbũh jweyát chóodih, wíih papélah tólihnadihbut ma ub jũúwá. Wíih papélah nũonadih bácah búdi wã náahna caá. Pánihna, caandihbut ma ub jũúwá.

¹⁴Alejandro wút jum̄ni itahdih teoni weemdíh búdi yeejép ā chãjap be.* Páant ā chãjatji jíib Dios caandíh ā peéh chãjbipna caá.* ¹⁵Caán Alejandro jwí bohéatdih búdi ā yap yohna caá. Pánihna, caandíh ma túi chãja chaáh, meemdíh yeejép ā chãjcat pínah niijná.

¹⁶Roma tútchidih moón í maáta weemdíh í jwíih uúbh joyóchah, wã chãjatjidih wã bohéatdihbut queétdih wã naáwáchah, det weemdíh teo wáacnit pínah í wihcap be. Úm̄nit, nihat weemdíh í cádah bejap be. Obohjeéhtih, páant weemdíh í cádahachah yuhna, Dios queétdih ā peéh

chãjca bojo naáh. ¹⁷Weemdíh páant í cádahachah yuhna, jwí Maáh Jesúsboó ā teo wáacap be, áih doonádih wã naóh beedáat pínah niijná, nihat judíowã nihcannit í joyát pínah niijná. Jiowá panihnit weemdíh í mao yohat déedih ā túi wapap be. ¹⁸Nihat weemdíh yeejép chãjnitdih yap yohnit, jwí Maáh weemdíh ā wapbipna caá. Pánih wapnit, jeáboó maáh ā jum̄apna weemdíh ā túi bejat túutbipna caá. Pánihna, yeó jáap jum̄at pah “Caán chah túini, chah wẽpni Maáh caá”, jwí niíj jíih. Páant tíi ā jum̄ nah.

Ā pée túyat tútat

¹⁹Prisca, Aquila,* Onesíforo* ā pebh moonbút í túyũ naáh. ²⁰Erasto* Corinto tútchiboó ā chãwáp jí. Tróximo* Mileto tútchiboó tubúp chũúhnit, ā chãwáp jí. ²¹Meémboó mah noój láa játih waicanjeh ma jũúwá. Eubulo, Pudente, Lino, Claudia, nihat bita Jesúsíhwãbut meemdíh í túyat túutna caá.

²²Jwí Maáh Jesucristo majeéh ā jum̄ naáh. Dios yeéb nihatdih oinit, ā túi teo wáaca naáh.

Páant bóojeh tigaá wã naáwát.
Pablo

* 4.11 Col 4.14; Flm 24 * 4.11 Hch 12.12,25; 13.13; 15.37-39; Col 4.10; Flm 24

* 4.12 Hch 20.4; Ef 6.21-22; Col 4.7-8 * 4.13 Hch 20.6 * 4.14 1Ti 1.20 * 4.14 Sal 62.12;

Ro 2.6 * 4.19 Hch 18.2,18 * 4.19 2Ti 1.16-17 * 4.20 Hch 19.22; Ro 16.23

* 4.20 Hch 20.4; 21.29